

四庫全書

經部

欽定四庫全書

欽定春秋傳說彙纂卷三十一

癸景王十  
西七年

十有四年

晉昭四年齊景二十年衛靈七年  
蔡平二年鄭定二年曹武二十七

年陳惠二年杞平八年宋元四年秦哀  
九年楚平王居元年吳夷末十六年

春意如至自晉

左傳

尊晉罪已也尊  
晉罪已禮也

穀梁

大夫執則致致則名意如  
惡然而致見君臣之禮也

胡傳

案左氏季孫猶在晉子服惠伯私於中行穆子  
曰魯事晉何以不如夷之小國土地猶大所命

能具若爲夷棄之使事齊楚何瘳於晉乃歸季孫其  
始執之爲之郛莒之供而非有扶弱擊彊之義也其  
終歸之爲土地猶大所命能具而非有不能救蔡爲  
夷執親之悔也然則晉人喜怒皆以利發其勤沮皆  
以利行違道甚矣故平丘之會深加貶斥自是而後  
諸侯不合二十餘年至於召陵又以賄敗十有八國  
之諸侯而書侵楚以譏之於是晉日益衰外攜內叛  
不復振矣利之能敗人國家乃如此春秋之深戒也  
集說 孫氏復曰大夫執則至至則名不稱氏前見也  
陳氏傅良曰大夫不致必見執也而後致亦  
危之也 程氏端學曰晉執意如不以其罪今又舍  
之亦無所爲不惟晉之無王命且見其執其舍皆出  
於私喜怒而非有  
公天下之心也

案孫氏復以不書氏爲前  
見於理亦通今竝得之

附錄左傳

南蒯之將叛也盟費人司徒老祁慮癸僞廢疾使請於南蒯曰臣願受盟而疾興若

以君靈不死請待間而盟許之二子因民之欲叛也請朝衆而盟遂劫南蒯曰羣臣不忘其君畏子以及今三年聽命矣子若弗圖費人不忍其君將不能畏子矣子何所不逞欲請送子請期五日遂奔齊侍飲酒於景公曰叛夫對曰臣欲張公室也子韓皙曰家臣而欲張公室罪莫大焉司徒老祁慮癸來歸費齊侯使鮑文子致之

三月曹伯滕卒

夏四月

附錄左傳

夏楚子使然丹簡上國之兵於宗丘且撫其民分貧振窮長孤幼養老疾收介特救

災患有孤寡赦罪戾詰姦慝舉淹滯禮新敘舊祿勲  
合親任良物官使屈罷簡東國之兵於召陵亦如之  
好於邊疆息民五  
年而後用師禮也

上國杜注在國都之西西方居上流故謂之上  
國宗丘杜注楚地當在今荊州府歸州境

# 秋葬曹武公

八月莒子去疾卒

在位十四年  
子郊公嗣

左傳

秋八月莒著丘公卒郊公不感國人弗順欲立  
著丘公之弟庚與蒲餘侯惡公子意恢而善於

庚與郊公惡公子鐸而善於意恢公子鐸因蒲餘  
侯而與之謀曰爾殺意恢我出君而納庚與許之

胡傳

卒自外錄者也莒人來赴故魯史書其卒葬自  
內錄者也魯人不往是以闕其葬自昭公以來

雖薛杞微國無不會其葬者何獨於莒則不往乎方  
是時意如專政而莒嘗訴其疆鄆取鄆之罪於方伯  
而見執矣爲是怒莒故獨不會其葬也夫怨不棄義  
惡不忘親怒不廢禮在桓公時雖與衛戰而宣公卒  
則往葬之不以私故絕吉凶慶弔往來施報之常禮  
也以此見意如之專恣矣若意如者其傲狠修怨敢  
施於昭公與莒子及其在晉聞除館西河則恐懼逃  
歸如一匹夫何也小人無禮喜怒勇怯不中節皆若  
是耳苟不遠之其能國乎

附錄左傳 楚令尹子旗有德於王不知度與養氏比  
而求無厭王患之九月甲午楚子殺鬬成

然而滅養氏之族使鬬  
辛居鄆以無忘鬬勲

冬莒殺其公子意恢

左傳 齊公子鐸逆庚與於齊齊隰黨公子鉏送之有

賂

穀梁言公子而不言大夫莒無大夫也莒無大夫而

無大夫者其義異也

集說 劉氏敞曰杜云意恢與亂君爲黨故書名惡之非也傳所言意恢死時事無有黨於亂君者正爲君自與意恢善而亂臣忌之欲先殺意恢乃逐其君耳且意恢與君兄弟也雖黨無惡詩人同姓之義猶曰不能奮飛況但善之何傷若君有小惡不務親輔而同姓之臣先懷異心欲肆其虐如是自謂不黨乎 孫氏覺曰公穀皆以爲曹莒無大夫蓋曹莒小國其大夫之位纔當大國之士春秋諸侯之士皆不

書名故曹莒大夫之名不見於經其有事繫懲勸法  
當書者則雖賤而名之邾庶其黑肱莒牟夷意恢是  
也王氏葆曰意恢之死罪累上也故以國殺爲文  
而不去其族陳氏傅良曰書殺意恢以非其罪也  
逐家氏鉉翁曰蒲餘侯與公子鐸比而爲亂殺意恢  
莒子卒而書意恢死受託孤之寄而不能其事者也  
故不書死難而書見殺程氏端學曰莒子卒而莒  
亂殺其君之親則莒之無政可知矣不曰殺其大夫  
而曰殺其公子者義不在於專殺大夫而在於殺君  
之親也

附錄左傳

晉那侯與雍子爭鄆田久而無成士景伯  
如楚叔魚攝理韓宣子命斷舊獄罪在雍

子雍子納其女於叔魚叔魚蔽罪那侯那侯怒殺叔  
魚與雍子於朝宣子問其罪於叔向叔向曰三人同

罪施生戮死可也雍子自知其罪而賂以買直鮒也  
鬻獄邢侯專殺其罪一也已惡而掠美爲昏貪以敗  
官爲墨殺人不忌爲賊夏書曰昏墨賊殺皋陶之刑  
也請從之乃施邢侯而尸雍子與叔魚於市仲尼曰  
叔向古之遺直也治國制刑不隱於親三數叔魚之  
惡不爲末滅曰義也夫可謂直矣平丘之會數其賄  
也以寬衛國晉不爲暴歸魯季孫稱其詐也以寬魯  
國晉不爲虐邢侯之獄言其貪也以正刑書晉不爲  
頗三言而除三惡加三利殺親益榮猶義也夫

甲景王十有五年晉昭五年齊景二十一年衛靈八  
戌八年十有五年年蔡平三年鄭定三年曹平公須

元年陳惠三年杞平九年宋元五年  
秦哀十年楚平二年吳夷末十七年

春王正月吳子夷末卒

公作夷昧

集說

家氏鉉翁曰謁餘祭夷昧迭爲君季子之讓著

節以國授闔廬宋穆之與夷是也乃俾僚冒以位

自處以致殺身名亂闔廬固首惡夷昧有責焉耳

## 二月癸酉有事于武宮籥入叔弓卒去樂卒事

左傳

春將禘于武公戒百官梓慎曰禘之日其有咎

乎二月癸酉禘叔弓泣事

籥入而卒去樂卒事禮也

胡傳

左氏曰禘于武宮叔弓泣事籥入而卒去樂卒

案曾子問君在祭不得成禮者夫子語之詳矣而無

有及大臣者是知祭而去樂不可也有事於宗廟遭

大夫之變則以聞可乎案禮衛有大史柳莊寢疾君

曰若疾革雖當祭必告是知祭而以聞不可也禮莫

重於當祭大夫有變而不以聞則內得盡其誠敬之心於宗廟外全隱恤之意於大臣是兩得之也然則有事於宗廟大臣蒞事篇入而卒於其所則如之何禮雖未之有可以義起也有事於宗廟大臣蒞事篇入而卒於其所去樂卒事其可也緣先祖之心見大臣之卒必聞樂不樂緣孝子之心視已設之饌必不忍輕徹故去樂而卒事其可也宗廟合禮者常事不書苟以爲可則春秋何書乎此記禮之變而書之者也

集說

杜氏預曰畧書有事爲叔弓卒起也武宮魯武公廟成六年復立之孔氏穎達曰有事謂有

祭事於武公之宮廟也祭必有樂樂有文舞武舞文執羽籥武執干鉞其入廟也必先文而後武當篇始入叔弓暴卒故於是去樂不用而終卒祭事也叔弓之卒當篇入之時故舉篇入也及其去之則諸樂皆

去故云去樂鐘鼓管磬悉皆去之非獨去箒舞也  
啖氏助曰穀梁言大夫之卒雖當祭禮皆告於君案  
宗廟大事大夫卒小事以理言之應待祭畢高氏  
閔曰成六年立武宮非禮也此有事于武宮則知自  
立宮之後祭之如親廟方其祭也而叔弓蒞事箒入  
而卒此豈雉鼎之變而已哉家氏鉉翁曰祭者主  
於誠慤不貳事者也故當祭雖大夫之喪不得以聞  
叔弓預於祭猝有疾而死則君爲之去樂卒事可也  
若叔弓自歿於其家如柳莊之比則當待祭畢而後  
告不當以卑而廢尊春秋書之記禮之變其常耳此  
與襄仲之卒去箒不同不可引以爲證也汪氏克  
寬曰有事武宮乃春祠之祭而不書祭名者以叔弓  
之卒去樂卒事變禮而書之非時祭之失故止曰有  
事而不曰祠也左氏以禘爲四時之祭遂誤以爲禘  
耳

夏蔡朝吳出奔鄭

朝公作昭無出字

左傳

楚費無極害朝吳之在蔡也欲去之乃謂之曰王唯信子故處子於蔡子亦長矣而在下位辱

必求之吾助子請又謂其上之人曰王唯信吳故處諸蔡二三子莫之如也而在其上不亦難乎弗圖必及於難夏蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其爲人之異也吳在蔡蔡必速飛去吳所以翦其翼也

胡傳

朝吳蔡之忠臣雖不能存蔡而能復蔡其從於棄疾者謂蔡滅而棄疾必能封之也棄疾以其

忠於舊君而信之使居舊國可謂知所信矣則曷爲出奔費無極害其寵也無極楚之讒人去朝吳出蔡侯朱喪太子建殺連尹奢屏王耳目使不聰明卒使吳師入郢辱及宗廟讒人爲亂可不畏乎爲國有九

經而尊賢爲上勸賢有四事而去讒爲首志朝吳出奔而入郢之師北矣然朝吳身居舊國處危疑之地苟有譖之者則王不能無動也能以忠信自任而杜讒諂之謀則善矣而費無極乃語之曰子亦長矣而在下位辱也欲爲之請以名利累其心而莫之覺不智亦甚矣故特書其出奔以罪吳爲後戒也

集說

范氏甯曰朝吳蔡大夫家氏鉉翁曰楚平存陳蔡若有古人之風然蔡雖存不能國也朝吳

仍居蔡費無極傾之故奔其後蔡之二君入楚不復昭侯將見留以賂而免卒復大離義見於朱之奔東國之死柏舉之戰

六月丁巳朔日有食之

附錄左傳

六月乙丑王太子壽卒  
秋八月戊寅王穆后崩

秋晉荀吳帥師伐鮮虞

左傳 晉荀吳帥師伐鮮虞圍鼓鼓人或請以城叛穆  
子弗許左右曰師徒不勤而可以獲城何故不  
爲穆子曰吾聞諸叔向曰好惡不愆民知所適事無  
不濟或以吾城叛吾所甚惡也人以城來吾獨何好  
焉賞所甚惡若所好何若其弗賞是失信也何以庇  
民力能則進否則退量力而行吾不可以欲城而通  
姦所喪滋多使鼓人殺叛人而繕守備圍鼓三月鼓  
人或請降使其民見曰猶有食色姑修而城軍吏曰  
獲城而弗取勤民而頓兵何以事君穆子曰吾以事  
君也獲一邑而教民怠將焉用邑邑以賈怠不如完  
舊賈怠無卒棄舊不祥鼓人能事其君我亦能事吾  
君率義不爽好惡不愆城可獲而民知義所有死命  
而無二心不亦可乎鼓人告食竭力盡而後  
取之克鼓而反不戮一人以鼓子載鞶歸

鼓杜注鉅鹿下曲陽縣有鼓聚案下曲陽故城在今直隸真定府晉州西今晉州治卽鼓國漢志所

謂鼓聚也以鼓城山而名

胡傳

晉滅潞氏甲氏及再伐鮮虞皆用大夫爲主將而或稱人

期而無矜惻之意則稱人見利忘義而以欺詐行之則稱國以正兵加敵而不納其叛臣則稱名氏大夫稱名氏非褒之也纔免於貶爾而春秋用兵禦敵之畧咸見矣

集說

呂氏大圭曰十二年伐之矣今又遣命卿帥師以伐之晉不能加於楚則從事於鮮虞而已

汪氏克寬曰宣十五年荀林父滅潞稱晉師宣十六年士會滅甲氏留吁稱晉人昭十二年荀吳伐鮮虞稱晉此年及定四年五年士鞅伐圍鮮虞哀六年趙鞅伐鮮虞皆稱將稱帥師湛氏若水曰案左氏傳

則苟吳不納叛不急利誠爲善矣然不能推此加諸  
彼何耶夫征者正有罪也鮮虞無罪而征之是尚爲  
能克其類也乎不知無罪而征人之國爲非義而徒  
以不納叛不急利之爲善是猶紇兄之臂而奪之食  
姑徐徐云耳

冬公如晉

左傳冬公如晉平丘之會故也

集說趙氏鵬飛曰公屢如晉而晉卻之至河乃復以  
季氏之故也今晉方爲魯執季氏而釋之公無  
所博晉無所庇故聽公一朝焉吳氏澂曰平丘之  
會公不與盟大夫被執公既往朝而不見納辱亦甚  
矣至此又往朝焉蓋畏  
大國不敢以辱爲恥也

附錄左傳

十二月晉荀躒如周葬穆后籍談爲介既葬除喪以文伯宴樽以魯壺王曰伯氏諸

侯皆之以鎮撫王室晉獨無有何也文伯揖籍談對曰諸侯之封也皆受明器於王室以鎮撫其社稷故能薦舞器於王晉居深山戎狄之與鄰而遠於王室王靈不及拜戎不暇其何以獻器王曰叔氏而忘諸乎叔父唐叔成王之母弟也其反無分乎密須之鼓與其大路文所以大蒐也闕鞏之甲武所以克商也唐叔受之以處參虛匡有戎狄其後襄之二路鉞鉞拒曳彤弓虎賁文公受之以有南陽之田撫征東夏非分而何夫有勲而不廢有績而載奉之以土田撫之以羹器旌之以車服明之以文章子孫不忘所謂福也福祚之不登叔父焉在且昔而高祖孫伯鯨司晉之典籍以爲大政故曰籍氏及卒有之二子董之晉於是乎有董史女司典之後也何故忘之籍談不能對賓出王曰籍父其無後乎數典而忘其祖籍談

歸以告叔向叔向曰王其不終乎吾聞之所樂必卒焉今王樂憂若卒以憂不可謂終王一歲而有三年之喪二焉於是乎以喪賓宴又求羹器樂憂甚矣且非禮也羹器之來嘉功之由非由喪也三年之喪雖貴遂服禮也王雖弗遂宴樂以早亦非禮也禮王之經也一動而失二禮無大經矣言以考典典以志舉典將焉用之

密須杜注姑姓國也在安定陰密縣今陰密故城在陝西平涼府靈臺縣西五十里

乙景王十有六年晉昭六年齊景二十二年衛靈九年  
陳惠四年杞平十年宋元六年秦哀十一年楚平三年吳僚元年

春

附錄左傳

十六年春王正月公在晉  
晉人止公不書諱之也

齊侯伐徐

左傳

齊侯伐徐二月丙申齊師至於蒲隧徐人行成徐子及邾人莒人會齊侯盟於蒲隧賂以甲父

之鼎叔孫昭子曰諸侯之無伯害哉齊君之無道也興師而伐遠方會之有成而還莫之亢也無伯也夫詩曰宗周既滅靡所止戾正大

夫離居莫知我肆其是之謂乎

蒲隧杜注徐地下邳取慮縣東有蒲如陂今在江南鳳陽府虹縣北甲父杜注古國名高平昌邑

縣東南有甲父亭昌邑城今在兗州府金鄉縣西北四十里

集說

許氏翰曰景公之時吳楚方爭晉既不能遠畧以齊之疆務德修政以通天下之志糾合諸侯

復霸可也而區區務爭徐伐莒之利志亦卑矣趙氏鵬飛曰徐自齊桓之霸內從北方宣成襄之世不見於經蓋從楚爾昭四年申之會徐人在焉楚人以其貳於吳也即會執之故明年徐從楚伐吳其後世比於楚今楚大亂之後楚平新立齊侯伐徐僥倖其或從也無桓公之德而望桓公之服徐吾見其不自量爾齊侯書爵非褒也杜謬以爲別大夫之專兵是也家氏鉉翁曰徐之封在齊南鄙桓公之霸楚成伐徐桓公躬率諸侯盟于牡丘次于匡以救之又出偏師伐厲以攻其所必救非但爲徐計亦自爲齊計今齊景脾睨晉霸而不能志其遠者乃伐徐以爲左右望之計視桓公之保徐有媿多矣李氏廉曰此爲晉霸既衰齊景公爭霸之始事盟而不書春秋不忍絕晉也齊景即位於襄二十五年今二十餘年矣自崔慶相殘之後委政二惠及樂高敗乃始親政不能明政刑以彊其國委任陳氏觀晏子之言而景公

之自治疎矣乃欲以無政之國爭疆圖霸宜其不遂  
振也晉自重丘以賂故不克有功於齊於是亦坐視  
而莫校矣汪氏克寬曰楚虔之立徐屢從楚伐莒  
昭十二年以爲貳於吳而圍之蓋徐實楚之與國也  
此年盟蒲隧而遂與齊踰十五年吳卒滅  
徐則甲父之鼎固不足以保徐之社稷也

楚子誘戎蠻子殺之

縣公作戎曼戎蠻杜注河南新城  
縣東南有蠻城後漢志新城有鄢

聚古鄢氏今名蠻中水經注汝水自梁縣東逕麻解  
城北故鄢鄉城也蠻麻聲近故誤耳章懷太子曰蠻  
中聚在梁縣東南今河南南陽  
府汝州西南有蠻城是其處也

左傳

楚子聞蠻氏之亂也與蠻子之無質也使然丹  
誘戎蠻子嘉殺之遂取蠻氏既而復立其子焉

集說

家氏鉉翁曰書誘書殺蓋罪之深皆以子稱見  
雖有大小彊弱之不同而於周班皆爲子不得

檀相侵陵況誘而殺之乎余氏先曰戎蠻戎之別種其稱戎猶赤狄之有潞氏甲氏留吁舒之有舒蓼舒庸舒鳩也戎蠻既稱子則安於王化而服從晉伯者也特以地在申葉許鄭之西而南界楚之白羽故楚人誘蠻子而殺之左氏謂以蠻子無質豈非爲其從晉乎誘而後殺不易屈也

案楚聞蠻氏之亂誘蠻子而殺之其罪大矣復立其子安得爲禮乎左氏之說謬也

附錄左傳

三月晉韓起聘於鄭鄭伯享之子產戒曰苟有位於朝無有不共恪孔張後至立於

客間執政禦之適客後又禦之適縣間客從而笑之事畢富子諫曰夫大國之人不可不慎也幾爲之笑而不陵我我皆有禮夫猶鄙我國而無禮何以求榮孔張失位吾子之恥也子產怒曰發命之不衷出令之不信刑之頗類獄之放紛會朝之不敬使命之不聽取陵於大國罷民而無功罪及而弗知僑之恥也

孔張君之昆孫子孔之後也執政之嗣也爲嗣大夫承命以使周於諸侯國人所尊諸侯所知立於朝而祀於家有祿於國有賦於軍喪祭有職受脰歸脰其祭在廟已有著位在位數世世守其業而忘其所僑焉得恥之辟邪之人而皆及執政是先王無刑罰也子寧以他規我宣子有環其一在鄭商宣子謁諸鄭伯子產弗與曰非官府之守器也寡君不知子大叔子羽謂子產曰韓子亦無幾求晉國亦未可以貳晉國韓子不可偷也若屬有讒人交關其間鬼神而助之以興其凶怒悔之何及吾子何愛於一環其以取憎於大國也蓋求而與之子產曰吾非偷晉而有二心將終事之是以弗與忠信故也僑聞君子非無賄之難立而無令名之患僑聞爲國非不能事大字小之難無禮以定其位之患夫大國之人令於小國而皆獲其求將何以給之一共一否爲罪滋大大國之求無禮以斥之何饜之有吾且爲鄙邑則失位矣

若韓子奉命以使而求玉焉貪淫甚矣獨非罪乎出一玉以起二罪吾又失位韓子成貪將焉用之且吾以玉賈罪不亦銳乎韓子買諸賈人既成賈矣商人曰必告君大夫韓子請諸子產曰日起請夫環執政弗義弗敢復也今買諸商人商人曰必以聞敢以爲請子產對曰昔我先君桓公與商人皆出自周庸次比耦以父殺此地斬之蓬蒿藜藿而共處之世有盟誓以相信也曰爾無我叛我無彊賈毋或勾奪爾有利市寶賄我勿與知恃此質誓故能相保以至於今今吾子以好來辱而謂敝邑彊奪商人是教敝邑背盟誓也母乃不可乎吾子得玉而失諸侯必不爲也若大國令而共無藝鄭鄙邑也亦弗爲也僑若獻玉不知所成敢私布之韓子辭玉曰起不敏敢求玉以微二罪敢辭之夏四月鄭六卿餞宣子於郊宣子曰二三君子請皆賦起亦以知鄭志子蠡賦野有蔓草宣子曰孺子善哉吾有望矣子產賦鄭之羔裘宣

子曰起不堪也子大叔賦褰裳宣子曰起在此敢勤  
子至於他人乎子大叔拜宣子曰善哉子之言是不  
有是事其能終乎子游賦風雨子旗賦有女同車子  
柳賦摯兮宣子喜曰鄭其庶乎二三君子以君命貺  
起賦不出鄭志皆昵燕好也二三君子數世之主也  
可以無懼矣宣子皆獻馬焉而賦我將子產拜使五  
卿皆拜曰吾子靖亂敢不拜德宣子私覲於子產以  
玉與馬曰子命起舍夫玉是賜我玉而免吾死也敢  
不藉手以拜

### 夏公至自晉

左傳公至自晉子服昭伯語季平子曰晉之公室其  
將遂卑矣君幼弱六卿彊而奢傲將因是以習  
習實爲常能無卑乎  
平子曰爾幼惡識國

胡傳

昭公數朝於晉三至於河而不得入兩得見晉侯又欲討其罪而止旃其因辱亦甚矣在易之

困曰困亨者因困窮而致亨也夫困於心衡於慮而後作徵於色發於聲而後喻此正憤排自彊之時而夏少康衛文公越勾踐燕昭王四君子者由此其選也今昭公安於危辱無激昂勉勵之志即所謂自暴自棄不可與有爲而人亦莫之告矣不亦悲乎諱而不書深貶之也

集說

家氏鉉翁曰公如晉踰歲涉三時之久乃還意如陷其君也其後公興兵討之勢不容已論者

謂爲啓釁非也

汪氏克寬曰十二年莒人愬取郚十三年平丘不與盟執意如士文伯辭公二十一年

辭將伐鮮虞惟二十三年有疾乃復又二年辭乎少姜非朝又曰公行一百七十有六惟僖公十七年十

二月會淮明年九月書至襄公二十八年十一月如楚明年五月書至昭公去年冬如晉今夏書至皆受

制於大國踰三時而始返雖不書晉人止公考其時則微傳而事著矣

秋八月己亥晉侯夷卒

左傳

秋八月晉昭公卒

集說家氏鉉翁曰晉之衰始於平成於昭頃以迨於

淺僅有厥慙平丘之會其餘則再伐鮮虞而已李氏曰晉至平昭伯事陵遲隳廢春秋所書皆錄變之大者也平公五盟六會服齊狄寧東夏平秦亂城淳于晉祁午數當時之功如此然內有變而不知外有患而不悟尚何有功足云哉尊爲邦君而授權於大夫此淝梁之會平公所謂內有變而不知者也身主夏盟而授權於荆蠻此宋之盟平公所謂外有患而不悟者也淝梁之事諸侯在會而大夫實主載書是委

權以與之也荀偃一怒而十二國興戎後五年欒盈之變作曲沃之民惟主欒氏不知公室晉幾分國而竝立矣宋之盟晉主夏盟而挈諸侯以畀楚是棄權以假之也虢之會再讀舊書後八年楚靈會于申實用齊桓召陵之典晉蓋十年無與國之事矣至於昭公之政則又微矣僅一會大夫一盟諸侯方楚虔辱於乾谿北方庶幾復伯爲晉君臣者改物厲志憤排警懼以率舊烈猶恐不逮今也四方未覲德而虎祁崇侈以啓貳列國未聞信而邾南盛兵以示汰平丘雖曰同盟齊敢拒令鄭敢爭承衛病芻蕘之擾魯困蠻夷之訴坐視諸侯之去而不之顧況能駕敵國哉宜乎晉之卑也

九月大雩

左傳 九月大雩 雩旱也

附錄左傳

鄭大旱使屠擊祝款豎柎有事於桑山斬其木不雨子產曰有事於山斲山林也而

斬其木其罪大矣奪之官邑

季孫意如如晉

冬十月葬晉昭公

左傳

冬十月季平子如晉葬昭公平子曰子服回之言猶信子服氏有子哉

丙景王二

十有七年

晉頃公去疾元年齊景二十三年衛靈十年蔡平五年鄭定五年曹

子十年

平三年陳惠五年杞平十一年宋元七年秦哀十二年楚平四年吳僚二年

春小邾子來朝

左傳

欽定春秋傳說彙纂

左傳十七年春小邾穆公來朝公與之燕季平子賦采叔穆公賦菁菁者莪昭子曰不有以國其能

乎久

集說汪氏克寬曰三年小邾穆公來朝至是十有五  
年再朝於昭公也  
郝氏敬曰魯既卑矣小國  
猶有朝者晉亦卑矣諸侯猶有往者此不畏其  
君而畏疆臣耳以力服人諸侯不可況大夫乎

夏六月甲戌朔日有食之

左傳夏六月甲戌朔日有食之祝史請所用幣昭子  
曰日有食之天子不舉伐鼓於社諸侯用幣於  
社伐鼓於朝禮也平子禦之曰止也唯正月朔慝未  
作日有食之於是乎有伐鼓用幣禮也其餘則否大  
史曰在此月也日過分而未至三辰有災於是乎百  
官降物君不舉辟移時樂奏鼓祝用幣史用辭故夏

書曰辰不集于房瞽奏鼓嗇夫馳庶人走此月朔之謂也當夏四月是謂孟夏平子弗從昭子退曰夫子將有異志不君君矣

集說杜氏預曰正月謂建巳正陽之月於周爲六月於夏爲四月孔氏穎達曰尚書云乃季秋月朔辰弗集於房彼季秋日食亦以此禮救之傳言惟正月朔日食乃有伐鼓用幣餘月則否引夏書而與夏書違者蓋先代尚質凡有日食皆用鼓幣周禮極文周家禮法見事有差降惟正陽之月特用鼓幣餘月則否

### 秋郊子來朝

左傳秋郊子來朝公與之宴昭子問焉曰少皞氏鳥名官何故也郊子曰吾祖也我知之昔者黃帝

一氏以雲紀故爲雲師而雲名炎帝氏以火紀故爲火師而火名共工氏以水紀故爲水師而水名大皞氏以龍紀故爲龍師而龍名我高祖少皞摯之立也鳳鳥適至故紀於鳥爲鳥師而鳥名鳳鳥氏歷正也玄鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鵙鳩氏司馬也鳩氏司空也爽鳩氏司寇也鵙鳩氏司事也五鳩鳩民者也五雉爲五工正利器用正度量夷民者也九扈爲九農正扈民無淫者也自顓頊以來不能紀遠乃紀於近爲民師而命以民事則不能故也仲尼聞之見於鄭子而學之既而告人曰吾聞之天子失官學在四夷猶信

集說 趙氏鵬飛曰小國之朝大國以其勢力足以庇小也魯方自庇不暇何暇庇人小邦子及鄭子來朝蓋亦無益矣 家氏鉉翁曰周魯俱衰典章闕壞而小國之君乃知前古官名之沿革蓋錄之也

黃氏正憲曰左氏載昭子問官之對仲尼見而學之然孔子刪書斷自唐虞而下至於論官惟曰揆岳牧伯公孤卿士等職而已若雲火龍鳥之類不少概見何哉蓋上古時樸事簡故可因瑞紀事以名其官中古文明漸開世變事繁故必分職正名命以民事孔子欲立萬世宜民之道是以舍遠而取近也邾子乃譏顓頊以來不能紀遠而紀近則聖人固有以折衷之矣所謂多聞擇其善者而從之者非耶

# 八月

晉荀吳帥師滅陸渾之戎

公作賁渾戎穀無之字

左傳

晉侯使屠蒯如周請有事於維與三塗萇弘謂

於楚必是故也君其備之乃警戎備九月丁卯晉荀吳帥師涉自棘津使祭史先用牲於維陸渾人弗知奔楚其衆奔甘鹿周大獲宣子夢文公攜荀吳而授

之陸渾故使穆子帥師獻俘於文宮

棘津杜注河津名水經注河水經東燕故城北則有濟水北來注之有棘津之名亦謂之石濟津故  
南津也今在河南衛輝府胙城縣北 甘鹿杜注周地今河南河南府宜陽縣有鹿蹄山甘水所出  
疑甘鹿以此得名水經注鹿蹄山在陸渾故城西北以傳文證之似亦可據

集說高氏閼曰宣三年楚子伐陸渾之戎自是陸渾睦於楚至是荀吳滅之 家氏鉉翁曰書名書

滅謂之非貶不可僖二十二年秦晉遷陸渾之戎於伊川非戎人侵犯王略自外居內也荀吳忽襲滅其國慘矣若謂其貳於楚則諸侯莫不皆貳何獨於陸渾有伐乎 汪氏克寬曰陸渾之戎本居秦晉之西北在荒服之外自僖之二十二年晉乃與秦遷之於伊川侵逼王畿則是晉人始謀不滅之過也今也與

楚爭疆掩其不備而滅之蓋不足以贖前過矣王  
氏樵曰書晉荀吳帥師滅陸渾之戎罪之也無王命  
動大衆不顧郊甸之震驚掩其不備利而取之不待  
貶絕而見矣或者猶謂此役異於闢土服遠而得無  
貶者失之矣王氏錫爵曰晉非爲王室除患乃因  
其貳楚而陰襲之使非長弘先見戎備素警則爲王  
室之震驚也大矣

### 冬有星孛于大辰

左傳冬有星孛于大辰西及漢中須曰彗所以除舊  
布新也天事恒象今除於大火出必布焉諸侯  
其有火災乎梓慎曰往年吾見之是其徵也火出而  
見今茲火出而章必火入而伏其居火也久矣其與  
不然乎火出於夏爲三月於商爲四月於周爲五月  
夏數得天若火作其四國當之在宋衛陳鄭平宋大

辰之虛也陳大皞之虛也鄭祝融之虛也皆火房也  
星孛及漢漢水祥也衛顓頊之虛也故爲帝丘其星  
爲大水水火之牡也其以丙子若壬午作乎水火所  
以合也若火入而伏必以壬午不過其見之月鄭裨  
竈言於子產曰宋衛陳鄭將同日火若  
我用瓘斚玉瓚鄭必不火子產弗與

公羊 孛者何彗星也其言于大辰何在大辰也大辰  
者何大火也大火爲大辰伐爲大辰北辰亦爲  
大辰何以  
書記異也

穀梁 一有一亡曰有于大  
辰者濫于大辰也

胡傳 大辰心也心爲明堂天子之象其前星太子後  
星庶子孛星加心象天子適庶將分爭也後五  
年景王崩王室亂劉子單子立王猛尹氏召伯立午  
朝歷數載而後定至哀十三年有星孛于東方不言

宿名者不加宿也當是時吳人僭亂憑陵上國日敝  
於兵暴骨如莽其戾氣所感固將壅吳而降之罰也  
故氛祲所指在於東方假手越人吳國  
遂滅天之示人顯矣史之有占明矣

集說杜氏預曰大辰房心尾也妖變非常故書  
氏穎達曰釋天云大辰房心尾也大辰謂之大

辰李巡云大辰蒼龍宿之體最爲明故曰房心尾也  
大火蒼龍宿心以候四時故曰辰孫炎曰龍星明者  
以爲時候故曰大辰大火也心在中最明故時候主  
焉公羊傳曰孛者何彗星也彗爲帚也言其狀似帚  
帚光芒孛孛然妖變之星非常所有故書之傳稱孛  
于大辰西經直書于大辰者雖在其星之西仍在  
辰分度之內故直云于大辰孫氏復曰孛彗之屬  
孛于大辰者在大辰也大辰大火許氏翰曰星孛  
大辰火災應之天地之符也大辰明堂當宋之分故  
王室亂宋亦亂衛陳鄭災氣所溢也衛亂君奔陳敗

卿獲唯鄭有令政而無後災是知禍福之可轉也  
余氏光曰季氏曰古者歷象日月星辰所重在於敬  
授人時故溫涼寒暑得其正而後作成訛易順其常  
時有愆忒則生育違氣有氛祲則淫邪作非細故也  
是以聖人修政務求合天君臣一德罔敢不誠觀允  
釐百工庶績咸熙之言可以見其所重在此因時自  
考非苟應虛文而已至於星之有名或以其形或以  
其位或以其事或以其人星本無名因象立上別  
三垣下分列宿所以定天體紀日躔初無預於占驗  
也故不言事應而事應具存焉春秋時始以辰爲商  
星參爲晉星龍爲宋鄭之星鶉火爲周分而分野之  
說因之以起循至戰國游談之士附爲惑世之言凡  
占休咎類主星名殊不知名星之次雜出無倫而事  
變無窮亦非星名所能盡紀其說有不可通者而率  
以私智推求偶有神合遂謂天常是先王敬授人時  
之實理反爲術家之所晦矣故彗孛之流氛祲之大

者其爲咎微明矣而王室嫡庶分爭在五年之後乃其偶合者耳豈專屬加心之應哉

楚人及吳戰于長岸

長岸杜注楚地今江南太平府當塗縣西南三十里有西梁山與東

梁山夾江相對如門之闕亦曰天門山一名娥眉山春秋楚獲吳乘舟餘皇處也

左傳吳伐楚陽句爲令尹卜戰不吉司馬令龜我請改卜

得上流何故不吉且楚故司馬令龜我請改卜

令曰魴也以其屬死之楚師繼之尚大克之吉戰于

長岸子魚先死楚師繼之大敗吳師獲其乘舟餘皇

使隨人與後至者守之環而壅之及泉盈其隧炭陳

以待命吳公子光請於其衆曰喪先王之乘舟豈惟

光之罪衆亦有焉請藉取之以救死衆許之使長鬣

者三人潛伏於舟側曰我呼餘皇則對師夜從之三

呼皆迭對楚人從而殺之楚師

亂吳人大敗之取餘皇以歸

胡傳

言戰不言敗勝負敵也楚地五千里帶甲數十萬戰勝諸侯威服天下本非吳敵也惟不能去

讒賤

貨使費無極以讒勝囊瓦以貨行而策士奇才

爲敵

國用故日以侵削至難父之師七國皆敗柏舉

之戰

國破君奔幾於亡滅吳日益彊而楚削矣是故

爲國

必以得賢爲本勸賢必以去讒賤貨爲先不然

雖廣

土衆民不足恃也攷其所書

本末

彊弱之由其爲後世戒明矣

集說

劉氏敞曰穀梁云進楚子故曰戰非也戰則云戰敗則云敗豈擇於吳楚哉陳氏傅良曰此

楚令

尹陽句也書人吳公子光也書國畧之也楚之

君大夫

不見於春秋者十八年而吳入郢矣五年吳

嘗敗

楚於鵲岸不書六年敗楚於房鍾不書書伐吳

而已

於是始書戰則以吳楚敵言之也汪氏克寬

曰楚

先勝吳吳後復勝楚季氏本曰長岸

杜元

凱以爲楚地蓋吳兵至楚境而禦之也

丁景王二十有八年晉頃二年齊景二十四年衛靈公十一年  
年陳惠六年杞平十二年宋元八年  
秦哀十三年楚平五年吳僚三年

春

附錄左傳十八年春王二月乙卯周毛得殺毛伯過而代之萇弘曰毛得必亡是昆吾稔之日也侈故之以而毛得以濟侈於王都不亡何待

集說王氏錫爵曰毛得之必亡也論其理則然惡在其爲昆吾稔之日哉脫非乙卯得遂保有其位乎則將謂不道而殺人者遇良日焉而可爲哉

王三月曹伯須卒

左傳 三月曹平公卒

夏五月壬午宋衛陳鄭災

左傳

夏五月火始昏見丙子風梓慎曰是謂融風火之始也七日其火作乎戊寅風甚壬午大甚宋

衛陳鄭皆火梓慎登大庭氏之庫以望之曰宋衛陳鄭也數日皆來告火裨竈曰不用吾言鄭又將火鄭人請用之子產不可子大叔曰實以保民也若有火國幾亡可以救亡子何愛焉子產曰天道遠人道邇非所及也何以知之竈焉知天道是亦多言矣豈不或信遂不與亦不復火鄭之未災也里析告子產曰將有大祥民震動國幾亡吾身泯焉弗良及也國遷其可乎子產曰雖可吾不足以定遷矣及火里析死矣未葬子產使輿三十人遷其柩火作子產辭晉公子公孫於東門使司寇出新客禁舊客勿出於宮使

子寬子上巡羣屏攝至於大宮使公孫登徙大龜使祝史徙主祐於周廟告於先君使府人庫人各徹其事商成公徹司宮出舊宮人寘諸火所不及司馬司寇列居火道行火所燬城下之人伍列登城明日使野司寇各保其徵郊人助祝史除於國北禳火於立寘回祿祈於四鄺書焚室而寬其征與之材三日哭國不市使行人告於諸侯宋衛皆如是陳不救火許不弔災君子是以知陳許之先亡也

公羊何以書記異也何以異爾異其同日而俱災也外異不書此何以書爲天下記異也

穀梁其志以同日也

胡傳禕竈所言蓋以象推非妄也而鄭不復火者予產當國方有令政此以德消變之驗矣是知吉凶禍福固有可移之理古人所以必先人事而後言命也

集說

杜氏預曰來告故書

孔氏穎達曰傳稱皆來

來告

而書公羊傳曰異其同日而俱災爲天下記異

也穀梁亦云其志以同日也杜因此傳有來告之文

故顯

而異之

孫氏復曰宋衛陳鄭同日而災也宋

衛陳

鄭同日而災

異之甚者劉氏敞曰四國同日

而俱災

非人力所爲也穀梁曰人有謂鄭子產曰某

日有災

子產曰天者神子惡知之是人也同日而爲

四國災

此非智者

之語

何足爲說也

案四國

皆來告火故春秋書其事杜注是也然同

日而四國

俱災其異甚矣公穀之說亦可竝存

六月邾人

入郕

杜注琅邪開陽縣水經注開陽在祊

之東南

沂水逕其南故郕國也今山東

兗州府

沂州北

十

五里有

開陽故城

左傳六月邾人藉稻邾人襲邾邾人將閉門邾人羊羅攝其首焉遂入之盡俘以歸邾子曰余無歸

矣從帑於邾邾莊公反邾夫人而舍其女

集說趙氏鵬飛曰春秋小國真蜂螫也睢大陽之溫則肆其毒邾子見削於魯亦甚矣今少安其巢

入其郭蓋以前日失鄆失鄆失鄆東田故僥倖於邾庶或掩其不備取此以償彼也是誠可疾故曰邾人

入鄆書人書入賤之也汪氏克寬曰書以惡邾且爲宋公伐邾起也季氏本曰邾宗姻也宗爲大國

近在邾南事大猶恐獲戾而無故入邾非召兵之道乎

# 秋葬曹平公

左傳

秋葬曹平公往者見周原伯魯焉與之語不說學歸以語閔子馬閔子馬曰周其亂乎夫必多

有是說而後及其大人大人患失而惑又曰可以無學無學不害不害而不學則苟而可於是乎下陵上替能無亂乎夫學殖也不學將落原氏其亡乎

附錄左傳

七月鄭子產爲火故大爲社被禳於四方振除火災禮也乃簡兵大蒐將爲蒐除子

大叔之廟在道南其寢在道北其庭小過期三日使除徒陳於道南廟北曰子產過女而命速除乃毀於而鄉子產朝過而怒之除者南毀子產及衝使從者止之曰毀於北方火之作也子產授兵登陴子大叔曰晉無乃討乎子產曰吾聞之小國忘守則危況有災乎國之不可小有備故也既晉之邊吏讓鄭曰鄭國有災晉君大夫不敢寧居卜筮走望不愛牲玉鄭之有災寡君之憂也今執事擱然授兵登陴將以誰

罪邊人恐懼不敢不告子產對曰若吾子之言敝邑之災君之憂也敝邑失政天降之災又懼讒慝之間謀之以啓貪人薦爲敝邑不利以重君之憂幸而不亡猶可說也不幸而亡君雖憂之亦無及也鄭有他竟望走在晉既事晉矣其敢有二心

集說王氏錫爵曰裨竈請禳子產既拒之曰天道遠人道邇不可謂非正論而茲復大爲社稷禳於四方以振除火災何歟

### 冬許遷于白羽

左傳楚左尹王子勝言於楚子曰許於鄭仇敵也而居楚地以不禮於鄭晉鄭方睦鄭若伐許而晉助之楚喪地矣君盍遷許許不專於楚鄭方有令政許曰余舊國也鄭曰余俘邑也葉在楚國方城外之

敵也土不可易國不可小許不可俘雖不可啓君其  
圖之楚子說冬楚子使王子勝遷許於析實白羽  
集說許遷于葉自是以後許常以葉爲都九年許遷  
于夷是自葉遷于夷也十三年傳曰楚之滅蔡也靈  
王遷許胡沈道房申於荆焉平王即位既封陳蔡而  
皆復之禮也注云荆荆山也滅蔡在十一年許又從  
夷遷於荆山平王復之復其本國許又歸於葉也故  
知此年遷于白羽是其自葉遷也且傳云葉在楚方  
城外之蔽明其欲遷之時許在葉也案傳王子勝言  
於楚子使之遷許則是楚人遷許非許自遷楚雖發  
意遷許許亦畏鄭樂遷故以自遷爲文若許不樂遷  
楚彊遷之當云楚人遷許如宋人遷宿齊人遷陽之  
類不得云許遷于白羽其以自遷爲文知許人自樂  
遷也胡氏寧曰本所以存許非彊之也汪氏克  
寬曰復封陳蔡而許亦遷葉故今自葉而遷許至是

三遷  
矣

戊景王二十有九年

晉頃三年齊景二十五年衛靈公

午元年陳惠七年杞平十三年宋元九年秦哀十四年楚平六年吳僚四年

春

附錄左傳

十九年春楚工尹赤遷陰於下陰令尹子瑕城郟叔孫昭子曰楚不在諸侯矣其僅

自完也以持其世而已楚子之在蔡也郟陽封人之女奔之生大子建及即位使伍奢爲之師費無極

爲少師無寵焉欲譖諸王曰建可室矣王爲之聘於秦無極與逆勸王取之正月楚夫人羸氏至自秦

陰杜注陰縣屬南鄉郡今湖廣襄陽府光化縣西漢水西岸有古陰縣城即下陰邑也郟陽杜注

蔡邑當在新蔡境

宋公伐邾

左傳 邾夫人宋向戌之女也故向寧請師二月宋公伐邾圍邾三月取之乃盡歸邾俘邾人邾人徐

人會宋公乙亥同盟於蟲

蟲杜注邾邑當在濟寧州東境

胡傳 案左氏宋公伐邾圍邾蟲取之而經不書圍與取何也初邾人藉稻邾人襲邾盡俘之邾子曰余無歸矣從帑於邾邾子反其夫人而舍其女夫人宋向戌之女也故向寧請師圍邾蟲取之盡歸邾俘此所謂聲罪執言之兵歸邾之俘其善意也故書伐邾而釋其取邑之罪此亦善善長惡惡短之義

集說高氏閔曰春秋錄而進之宋元於此一正入郕之  
而書侵伐者多貶此繼邾人入郕而書宋公伐邾則  
與宋公之討有罪也卓氏爾康曰邾以蕞爾小邦  
而侵魯鄙用鄆子黠驚素甚故宋元親討  
之以懲其暴橫不第爲向戌報女怨也

夏五月戊辰許世子止弑其君買

左傳

夏許悼公瘧五月戊辰飲大子止之藥卒大子  
奔晉書曰弑其君君子曰盡心力以事君舍藥

物可也

穀梁

止不弑而曰弑責止也止曰我與夫弑者不立  
乎其位以與其弟虺哭泣歔飭粥嗑不容粒未

踰年而死故君子即  
止自責而責之也

胡傳

案左氏許悼公瘡戊辰飲世子止之藥卒書曰弑其君者止不嘗藥也古者醫不止世不服其

藥夫子之所慎者三疾居其一季康子饋藥曰丘未達不敢嘗敬慎其身如此也而於君父可忽乎君有疾飲藥臣先嘗之父有疾飲藥子先嘗之蓋言慎也止不擇醫而輕用其藥藥不先嘗而誤進於君是有忽君父之心而不慎矣自小人之情度之世子弑君欲速得其位而止無此心故曰我與夫弑者不立乎其位哭泣歆飢粥噍不容粒未逾年而卒無此心故被以大惡而不受自君子聽之止不嘗藥是忽君父之尊而不慎也而止有此心忽君父之尊而不慎此篡弑之萌堅冰之漸而春秋之所謹也有此心故加以大惡而不得辭書許世子止弑君乃除惡於微之意也而或者顧以操刃而殺與不躬進藥及進藥而不嘗三者罪當殊科疑於三傳之說則誤矣必若此言夫人而能為春秋奚待於聖筆乎墨翟兼愛豈其

無父楊朱爲我豈其無君孟軻氏辭而闕之以爲禽獸逼人將相食後世推明其功不在禹下未有譏其過者知此說則知止不當

藥春秋

以爲弑君之意矣

集說

劉氏敞曰穀梁云日弑正卒也非也州吁無知督萬商臣趙盾歸生夏徵舒崔杼甯喜弑君皆

書日可云皆正卒乎春秋褒貶豈不明恃日月而後見之此泥而不通也蘇氏轍曰許悼公瘡飲世子

止之藥而卒其以弑書之何也止雖不志乎弑其君由止以卒則亦止弑之也君由止以卒而不以弑君

書之則臣將輕其君子將輕其父亂之道也故止之弑君雖異乎楚商臣蔡般也而春秋一之所以隆君

父也今律過失殺人以贖論過失殺其尊卑減殺人二等過失殺大父母減殺人一等而和御藥誤不如法

者死父子之親許以情論至於君臣則情不勝法此蓋春秋之遺意也胡氏寧曰悼公不起是飲非其

樂而致卒也止不嘗藥是有忽君父之心而不敬也  
樂正子下堂傷足而有憂色跬步之間猶不敢忘父  
母況父母之疾而可輕之乎陳氏傳良曰哀姜慶  
父弑閔公書曰公薨夫人姜氏孫于邾公牛慶父出  
奔莒則罪人斯得矣許悼公飲世子止之藥而卒世  
子奔晉世子止誠不嘗藥爾春秋將爲後人戒書曰  
世子止弑其君不言奔可也張氏洽曰藥劑所以  
致人之死者非一端姑以瘡言之今之治瘡以砒燬  
而餌之多愈然燬不得法而反殺人者多矣悼公之  
死必此類也然止以弑書何也孟子曰殺人以梃與  
刃有以異乎曰無以異也以刃與政有以異乎曰無  
以異也進藥而藥殺可不謂之弑哉其所以異於商  
臣蔡般者過與故不同耳心雖不同而春秋之文一  
施之者以臣子之於君父不可過也萬氏孝恭曰  
許止之事雖若可恕萬一後世臣子幸君父之疾進  
藥以斃之而自附於不知嘗藥之義是啓之爲亂原

也李氏廉曰春秋加趙盾弑君訓人以臣道也加許止弑君訓人以子道也二事相類然晉靈公不書葬而許悼公書葬者許止自責逾年而卒其心可知矣趙盾力能討賊而不討春秋不得不終誅之也若陳氏因左氏止奔晉之說而疑止真弑父則又恐未可以一家一句而盡廢諸傳之文也汪氏克寬曰悼公在位二十四年世子止之弟斯立是爲元公金氏賢曰自左氏之說而觀之則是藥不由醫止所進也悼公之死藥所致也胡文定公謂忽其君父者是矣自穀梁之說而觀之止痛父之死咎已之深豈有殺其君父之心哉特以未達藥性製之不精用之不當以誤之耳歐陽文忠公謂止實弑君者誤矣或曰藥以誤君固有罪矣然與弑其父者殊科書弑可乎曰藥出於止而君死於藥非弑而何書以大惡非彊加之也故書曰許世子止弑其君買

案許止弑君三傳不同要之皆以爲非弑而公羊聽止赦止之說更爲允當蓋止之非弑有屬辭比事而知之者春秋世子弑君者三楚商臣蔡般皆立乎其位而止則弗立乎其位者也此比事而可知者也許與陳蔡皆密邇於楚楚虔能假討賊之名以滅陳蔡何棄疾獨釋許不問乎況白羽既還楚方引許以自近也此屬辭而可知者也止之非弑亦明矣聖人以書弑者蓋以悼公之死由於世子之藥則止雖非弑而弑君之罪止有不得而辭者故加弑焉所以教天下之爲臣子者也諸儒紛紛謂止實進毒以弑其君不亦過乎左氏以爲止奔晉穀梁以爲止未踰年而死二說不同今無所考姑兩存之

己卯地震

集說 汪氏克寬曰經書地震者五昭公之世再見此年及二十三年是也夫地道安靜以震動爲反

常之異臣道恭順以悖逆爲犯上之惡是時季孫強  
僭已甚天之示變欲人君之有所警而以德銷之也  
昭公漫不知省  
逸及於難悲夫

附錄左傳

楚子爲舟師以伐濮費無極言於楚子曰

爭若大城城父而寘大子焉以通北方王牧南方是  
得天下也王說從之故大子建居於城父令尹子瑕  
聘於秦拜  
夫人也

濮衆百濮叛楚杜注夷也昭元年趙孟曰吳濮有  
蠻杜注建寧郡南有濮夷此年楚子伐濮杜注南  
夷三注不同蓋種族不同而  
約言其地當在楚之西南境

秋齊高發帥師伐莒

左傳

秋齊高發帥師伐莒莒子奔紀鄆使孫書伐之

紀鄆防焉以度而去之及師至則投諸外或獻諸子

占子占使師夜緇而登登者六十人緇絕師鼓譟城

門

上之人亦譟莒共公懼啓西

紀鄆杜注莒邑也東海贛榆縣有紀城寰宇記云

在縣東北七十五里今山東莒州即江南贛榆縣

也界

集說高氏閻曰莒不事齊故

汪氏克寬曰齊景爭

伯之心不下於僖桓而徒計近功汲汲焉有事

冬葬許悼公

公羊

賊未討何以書葬不成於弒也曷爲不成於弒

焉爾

譏子道之不盡也其譏子道之不盡奈何曰樂

正予春之視疾也復加一飯則脫然愈復損一飯則

脫然愈復加一衣則脫然愈復損一衣則脫然愈止

進藥而藥殺是以君子加弒焉爾曰許世子止弒其

君買是君子之聽止也葬許悼公是君

子之赦止也赦止者免止之罪辭也

胡傳

何以書葬穀梁子曰不使止爲弒父也其說曰

子既生不免乎水火母之罪也羈貫成童不就

師傅父之罪也就師學問無方心志不通身之罪也

心志既通而名譽不聞友之罪也名譽既聞有司不

舉有司之罪也有司舉之王者不用王者之過也許

世子止不知嘗藥累及許君也觀止自責可謂有過

人之質矣乃至以弒君獲罪此爲人臣子而不知春

秋之義者也古者太子自其初生固舉以禮有司端

冤見之南郊過闕則下過廟則趨爲赤子而其教已有齊肅敬慎之端矣此春秋訓臣子除惡於微積善於早之意也

集說

家氏鉉翁曰或問蔡般之弒景許止之弒悼皆書葬同乎否乎曰其弒異其葬烏得而同姚

氏舜牧曰悼公書弒著世子止有弒君之事是謹嚴春秋悼公書葬明世子止無弒君之心是忠恕春秋

附錄左傳

是歲也鄭駟偃卒子游娶於晉大夫生絲弱其父兄立子瑕子產憎其爲人也且以

爲不順弗許亦弗止駟氏聳他日絲以告其舅冬晉人使以幣如鄭問駟乞之立故駟氏懼駟乞欲逃子

產弗遣請龜以卜亦弗予大夫謀對子產不待而對客曰鄭國不天寡君之二三臣札瘥天昏今又喪我

先大夫偃其子幼弱其一二父兄懼隊宗主私族於謀而立長親寡君與其二三老曰抑天實剝亂是吾

何知焉諺曰無過亂門民有兵亂猶憚過之而況敢  
知天之所亂今大夫將問其故抑寡君實不敢知其  
誰實知之平丘之會君尋舊盟曰無或失職若寡君  
之二三臣其即世者晉大夫而專制其位是晉之縣  
鄙也何國之爲辟客幣而報其使晉人舍之楚人  
城州來沈尹戌曰楚人必敗昔吳滅州來子旗請伐  
之王曰吾未撫吾民今亦如之而城州來以挑吳能  
無敗乎侍者曰王施舍不倦息民五年可謂撫之矣  
戍曰吾聞撫民者節用於內而樹德於外民樂其性  
而無寇讎今宮室無量民人日駭勞罷死轉忘寢與  
食非撫之也鄭大水龍鬪於時門之外洧淵國人  
請爲禳焉子產弗許曰我鬪龍不我覲也龍鬪我獨  
何覲焉禳之則彼其室也吾無求於龍龍亦無求於  
我乃止也令尹子瑕言蹶由楚子曰彼何罪諺  
所謂室於怒市於色者楚之謂  
矣舍前之忿可也乃歸蹶由

洧澗杜注洧水出滎陽密縣至長平入潁案今洧水自密縣東流經新鄭縣南門又東會漆水謂之

雙洧河即洧澗也

已景王二十年晉頃四年齊景二十六年衛靈十三年  
惠八年杞平十四年宋元十年秦哀十五年楚平七年吳僚五年

春王正月

附錄左傳

二十年春王二月己丑日南至梓慎望氛曰今茲宋有亂國幾亡三年而後弭蔡有

大喪叔孫昭子曰然則戴桓也汰侈無禮已甚亂所  
在也費無極言於楚子曰建與伍奢將以方城之  
外叛自以爲猶宋鄭也齊晉又交輔之將以害楚其  
事集矣王信之問伍奢伍奢對曰君一過多矣何信

於讒王執伍奢使城父司馬奮揚殺太子未至而使  
遣之三月大子建奔宋王召奮揚奮揚使城父人執  
已以至王曰言出於余口入於爾耳誰告建也對曰  
臣告之君主命臣曰事建如事余臣不佞不能苟貳  
奉初以還不忍後命故遣之既而悔之亦無及已王  
曰而敢來何也對曰使而失命召而不來是再奸也  
逃無所入王曰歸從政如他日無極曰奢之子材若  
在吳必憂楚國盍以免其父召之彼仁必來不然將  
爲患王使召之曰來吾免而父棠君尚謂其弟員曰  
爾適吳我將歸死吾知不逮我能死爾能報聞免父  
之命不可以莫之奔也親戚爲戮不可以莫之報也  
奔死免父孝也度功而行仁也擇任而往知也知死  
不辟勇也父不可棄名不可廢爾其勉之相從爲愈  
伍尚歸奢聞員不來曰楚君大夫其盱食乎楚人皆  
戮之員如吳言伐楚之利於州于公子光曰是宗爲  
戮而欲反其讎不可從也員曰彼將有他志余姑爲

之求士而鄙以待之乃見罇設諸焉而耕於鄙

集說杜氏預曰是歲朔旦冬至之歲也當言正月巳丑朔日南至時史失閏閏更在二月後故經因史而書正月傳更具於二月記南至日以正歷也孔氏穎達曰歷法十九年爲一章章首之歲必周之正月朔旦冬至僖五年正月辛亥朔日南至是章首之歲年也計僖五年至往年合一百三十三年是爲七章今年復爲章首故曰是歲朔旦冬至之歲也朔旦冬至謂正月之朔當言正月巳丑朔日南至今傳乃云二月巳丑日南至是錯名正月爲二月也歷之正法往年十二月後宜置閏月即此年正月當是往年閏月此年二月乃是正月故朔日巳丑日南至也時史失閏往年錯不置閏閏更在二月之後傳於八月之下乃云閏月戊辰殺宣姜是閏在二月後也時史以閏月爲正月故經因史而書正月從其誤而書

之傳以經之正月實非正月更於  
二月記南至之日以正厯之失也

夏曹公孫會自鄴出奔宋

鄭莫公反穀作夢鄴杜注曹邑在今兗州府曹州北

集說

杜氏預曰嘗有玉帛之使來告故書孫氏復曰鄴公孫會之邑也言自鄴出奔宋者以別從

國都而去爾

劉氏敞曰春秋之時臣能專其邑無

不畔其國者能使其衆無不要其君者臧武仲之智

可謂智矣然猶據防以求爲後於魯是以孔子譏之

以謂其罪與不孝非聖者均也不孝則無親非聖則

無法要君則無上三者皆大亂之道也故深察公孫

歸父之至桎奔齊公孫會之自鄴奔宋也其賢於臧

武仲遠矣公羊曰爲公子喜時之後諱也非也春秋

之義善惡各以其事進退之何有賢其祖而遂諱其

後子孫惡乎且所以諱賢者之過者謂小不足以妨

大短不足以毀長而可以成人之美者也若乃大惡

至叛君專地反臣子之義亂人倫之常矣而猶爲之諱乎如必賢者子孫則罪皆可諱是管蔡不誅於周也由是觀之所謂爲公子喜時諱其義安在哉穀梁曰自夢者專乎夢也曹無大夫其曰公孫言其以貴取之而不以叛也非也若臣不叛君常事爾何足褒哉高氏閔曰會子臧之子鄆子臧之采邑也汪氏克寬曰春秋書大夫自其叛邑出奔者皆先書叛故宋華亥向寧華定自南里出奔楚先書入南里以叛宋公弟辰自蕭來奔先書入蕭以叛此書自鄆出奔而先不書叛則非叛也蓋鄆乃公孫會繼其父之食邑而得專制之者如穀梁之說爾得罪待放君無赦命是以自其所食之邑而奔他國也王氏樵曰案公羊猶曰諱胡氏直謂其待放而後出奔得去國之禮而賢之矣又曰待放而後出奔臣子常禮免於貶足矣而何以賢之爲公子喜時之後賢之也視公羊尤迂曲矣余氏光曰邾氏曰公孫會曹大夫出

奔宋傳不詳其故公羊揣爲子臧之後以邑叛爲賢者之後諱夫子臧之節春秋不錄何爲爲其子孫諱逆大夫多賢者後而皆諱則無一書矣春秋政在大夫出奔必書何諱之有

附錄左傳

宋元公無信多私而惡華向華定華亥與向寧謀曰亡愈於死先諸華亥僞有疾以

誘羣公子公子問之則執之夏六月丙申殺公子寅公子御戎公子朱公子固公孫援公孫丁拘向勝向行於其廩公如華氏請焉弗許遂劫之癸卯取大子樂與母弟辰公子地以爲質公亦取華亥之子無感向寧之子羅華定之子啓與華氏盟以爲質

秋盜殺衛侯之兄執繫

繫公穀作輒

左傳衛公孟縶狎齊弱奪之司寇與鄆有役則反之無則取之公孟惡北宮喜褚師圍欲去之公子

朝通於襄夫人宣姜懼而欲以作亂故齊豹北宮喜  
褚師圉公子朝作亂初齊豹見宗魯於公孟爲驂乘  
焉將作亂而謂之曰公孟之不善子所知也勿與乘  
吾將殺之對曰吾由子事公孟子假吾名焉故不吾  
遠也雖其不善吾亦知之抑以利故不能去是吾過  
也今聞難而逃是僭子也子行事乎吾將死之以周  
事子而歸死於公孟其可也丙辰衛侯在平壽公孟  
有事於蓋獲之門外齊子氏惟於門外而伏甲焉使  
祝鼫寘戈於車薪以當門使一乘從公孟以出使華  
齊御公孟宗魯驂乘及闔中齊氏用戈擊公孟宗魯  
以背蔽之斷肱以中公孟之肩皆殺之公聞亂乘駟  
自闔門入慶比御公公南楚驂乘使華寅乘貳車及  
公宮鴻駟馳乘於公公載寶以出褚師子申遇公  
於馬路之衢遂從過齊氏使華寅肉袒執蓋以當其  
闕齊氏射公中南楚之背公遂出寅閉郭門踰而從  
公公如死鳥析朱鉏宵從寶出徒行從公齊侯使公

孫青聘於衛既出聞衛亂使請所聘公曰猶在竟內則衛君也乃將事焉遂從諸死鳥請將事辭曰亡人不佞失守社稷越在草莽吾子無所辱君命賁曰寡君命下臣於朝曰阿下執事臣不敢貳主人曰君若惠顧先君之好照臨敝邑鎮撫其社稷則有宗祧在乃止衛侯固請見之不獲命以其良馬見爲未致使故也衛侯以爲乘馬賁將振主人辭曰亡人之憂不可以及吾子草莽之中不足以辱從者敢辭賁曰寡君之下臣君之牧圉也若不獲扞外役是不有寡君也臣懼不免於戾請以除死親執鐸終夕與於燎齊氏之宰渠子召北宮子北宮氏之宰不與聞謀殺渠子遂伐齊氏滅之丁巳晦公入與北宮喜盟於彭水之上秋七月戊午朔遂盟國人八月辛亥公子朝褚師圉子玉賁子高魴出奔晉閏月戊辰殺宣姜衛侯賜北宮喜謚曰貞子賜析朱鉏謚曰成子而以齊氏之墓予之衛侯告寧於齊且言子石齊侯將飲酒徧

賜大夫曰二三子之教也苑何忌辭曰與於青之賞必及於其罰在康誥曰父子兄弟罪不相及況在羣臣臣敢貪君賜以干先王琴張聞宗魯死將弔之仲尼曰齊豹之盜而孟縶之賊女何弔焉君子不食姦不受亂不爲利疚於回不以回待人蓋不義不犯非禮

平壽杜注衛下邑蓋獲杜注衛郭門死鳥杜注衛地

公羊

母兄稱兄兄何以不立有疾也何疾爾惡疾也

穀梁

盜賤也其曰兄母兄也目衛侯衛侯累也然則何爲不爲君也曰有天疾者不得入乎宗廟輒

者何也曰兩足不能相過齊謂之綦楚謂之跖衛謂之輒

集說

孫氏復曰衛侯之母兄而盜得殺之衛侯之無刑政也故曰盜殺衛侯之兄縶以著其惡劉

氏敵曰其兄云者以重書也何重乎衛侯之兄輒言不能親親也干乘之國亦大矣而盜得以殺其兄故君子閔焉張氏洽曰繫以有疾不得列於宗而廢是以靈公得立則所以事其兄使全其身者必無所不用其至親愛之而使不得有爲於其國此舜所以盡其恩於兄弟也靈公受國於有疾之兄乃聽其無禮於大夫且俾之預於政而又不能防閑其母以預制其禍亂使盜賊竊發兄死身危幾亡其國故書盜殺衛侯之兄繫以深罪之也李氏廉曰左氏說見昭三十一年胡氏不取然春秋書盜者四尉止也齊豹也公孫翩也陽虎也皆大夫也故任公輔以爲豹非卿故曰盜而陳氏亦曰既奪之司寇則非卿矣恐其說亦是其罪衛侯之說公穀得之諸家皆同金氏賢曰經所謂盜果誰謂乎曰謂齊豹也豹具官於衛何以盜名曰以其爲盜賊之事是亦盜賊而已矣書之爲盜賤之也是以蔡公孫翩亦書盜行同於豹

也

冬十月宋華亥向寧華定出奔陳

寧公作甯

左傳

宋華向之亂公子城公孫忌樂舍司馬彊向宜向鄭楚建邨申出奔鄭其徒與華氏戰於鬼閭

敗子城于城適晉華亥與其妻必盟而食所質公子者而後食公與夫人每日必適華氏食公子而後歸華亥患之欲歸公子向寧曰唯不信故質其子若不歸之死無日矣公請於華費遂將攻華氏對曰臣不敢受死無乃求去憂而滋長乎臣是以懼敢不聽命公曰子死亡有命余不忍其詢冬十月公殺華向之質而攻之戊辰華向奔陳華登奔吳向寧欲殺大子華亥曰干君而出又殺其子其誰納我且歸之有庸使少司寇慍以歸曰子之齒長矣不能事人以三公子爲質必免公子既入華慍將自門行公遽見之執

其手曰余知而無  
罪也入復而所

鬼閭杜注潁川長平縣西北有閭亭今河南  
開封府陳州西華縣東北閭倉亭城是也

集說陳氏傳良曰公子城公孫忌八子奔鄭華亥向  
寧華定奔陳其但書三子何衆不可勝罪則罪

其甚者入南里以叛乞師於楚爲宋患之日久是以  
甚三子也呂氏大圭曰一宋國也而大夫同出奔

以見君不能待其臣而臣不能事其君也家氏鉉  
翁曰書三卿同日而奔不惟誅華向其君亦有責焉

爾季氏本曰陳宋讎也三大夫  
往奔欲依陳爲亂而宋其危矣

十有一月辛卯蔡侯廬卒廬左  
作廬

附錄左傳

齊侯疥遂痞期而不瘳諸侯之賓問疾者  
多在梁丘據與裔欸言於公曰吾事鬼神

豐於先君有加矣。今君疾病爲諸侯憂，是祝史之罪也。諸侯不知其謂我不敬君，盍誅於祝固。史嚚以辭，宥公說。告晏子，晏子曰：「宋之盟，屈建問范會之德於趙武。趙武曰：『夫子之家事治，言於晉國，竭情無私。』其祝史祭祀陳信，不愧其家事，無猜其祝史。不祈建以語，康王康王曰：『神人無怨，宜夫子之光輔五君，以爲諸侯主也。』」公曰：「據與欵謂寡人能事鬼神，故欲誅於祝史。子稱是語，何故？」對曰：「若有德之君，外內不廢，上下無怨，動無違事，其祝史薦信，無愧心矣。是以鬼神用饗，國受其福。祝史與焉，其所以蕃祉老壽者爲信。君使也，其言忠信於鬼神，其適遇淫君，外內頗邪，上下怨疾，動作辟違，從欲厭私，高臺深池，撞鐘舞女，斬刈民力，輸掠其聚，以成其違，不恤後人，暴虐淫從，肆行非度，無所還忌，不思謫譴，不憚鬼神，怒民痛無悛於心。其祝史薦信，是言罪也。其蓋失數美，是矯誣也。進退無辭，則虛以求媚，是以鬼神不饗其國，以

禍之祝史與焉所以天昏孤疾者爲暴君使也其言  
僭慢於鬼神公曰然則若之何對曰不可爲也山林  
之木衡鹿守之澤之萑蒲舟鰲守之藪之薪蒸虞侯  
守之海之鹽蜃祈望守之縣鄙之人入從其政偪介  
之關暴征其私承嗣大夫彊易其賄布常無藝徵斂  
無度宮室日更淫樂不違內寵之妄肆奪於市外寵  
之臣僭令於鄙私欲養求不給則應民人苦病夫婦  
皆詛祝有益也詛亦有損聊攝以東姑尤以西其爲  
人也多矣雖其善祝豈能勝億兆人之詛君若欲誅  
於祝史修德而後可公說使有司寬政毀關去禁薄  
斂已責十二月齊侯田於沛招虞人以弓不進公  
使執之辭曰昔我先君之田也旃以招大夫弓以招  
士皮冠以招虞人臣不見皮冠故不敢進乃舍之仲  
尼曰守道不如守官君子韙之齊侯至自田晏子  
侍於遄臺子猶馳而造焉公曰唯據與我和夫晏子  
對曰據亦同也焉得爲和公曰和與同異乎對曰異

和如羹焉水火醯醢鹽梅以烹魚肉燂之以薪宰夫  
和之齊之以味濟其不及以洩其過君子食之以平  
其心君臣亦然君所謂可而有否焉臣獻其否以成  
其可君所謂否而有可焉臣獻其可以去其否是以  
政平而不干民無爭心故詩曰亦有和羹既戒既平  
酸醎無言時靡有爭先王之濟五味和五聲也以平  
其心成其政也聲亦如味一氣二體三類四物五聲  
六律七音八風九歌以相成也清濁小大短長疾徐  
哀樂剛柔遲速高下出入周疏以相濟也君子聽之  
以平其心心平德和故詩曰德音不瑕今據不然君  
所謂可據亦曰可君所謂否據亦曰否若以水濟水  
誰能食之若琴瑟之專壹誰能聽之同之不可也如  
是飲酒樂公曰古而無死其樂若何晏子對曰古而  
無死則古之樂也君何得焉昔爽鳩氏始居此地季  
荊因之有逢伯陵因之蒲姑氏因之而後大公因之  
古若無死爽鳩氏之樂非君所願也鄭子產有疾

謂子大叔曰我死子必爲政唯有德者能以寬服民  
其次莫如猛夫火烈民望而畏之故鮮死焉水懦弱  
民狎而翫之則多死焉故寬難疾數月而卒大叔爲  
政不忍猛而寬鄭國多盜取人於萑苻之澤大叔悔  
之曰吾早從夫子不及此興徒兵以攻萑苻之盜盡  
殺之盜少止仲尼曰善哉政寬則民慢慢則糾之以  
猛猛則民殘殘則施之以寬寬以濟猛猛以濟寬政  
是以和詩曰民亦勞止汙可小康惠此中國以綏四  
方施之以寬也毋從詭隨以謹無良式遏寇虐慘不  
畏明糾之以猛也柔遠能邇以定我王平之以和也  
又曰不競不綈不剛不柔布政優優百祿是道和  
之至也及子產卒仲尼聞之出涕曰古之遺愛也  
聊攝杜注齊西界平原聊城縣東北有攝城今聊  
城屬東昌府 姑尤杜注齊東界姑尤水皆在  
城陽郡東南入海姑水即登州府黃縣之大姑河  
尤水即萊州府掖縣之小姑河 萑苻杜注澤名

疑即中牟澤周禮所謂圃田澤跨中牟洧川尉氏界

庚景王二十有一年晉頃五年齊景二十七年衛靈辰十四年二十有一年十四年蔡悼公東國元年鄭定

九年曹悼三年陳惠九年杞平十五年宋元十一年秦哀十六年楚平八年吳僚六年

# 春

附錄左傳二十一年春天王將鑄無射泠州鳩曰王其以心疾死乎夫樂天子之職也夫音樂

之與也而鍾音之器也天子省風以作樂器以鍾之與以行之小者不窺大者不櫛則和於物物和則嘉成故和聲入於耳而藏於心心億則樂窺則不咸櫛則不容心是以感感實生疾今鍾櫛矣王心弗堪其能久乎

# 王三月葬蔡平公

左傳

三月葬蔡平公蔡大子朱失位位在卑大夫送葬者歸見昭子昭子問蔡故以告昭子歎曰蔡

其亡乎若不亡是居也必不終詩曰不解于位民之攸暨今蔡侯始即位而適卑身將從之

夏晉侯使士鞅來聘

書聘止此

左傳

夏晉士鞅來聘叔孫爲政季孫欲惡諸晉使有司以齊鮑國歸費之禮爲士鞅士鞅怒曰鮑國

之位下其國小而使鞅從其牢禮是卑敝邑也將復諸寡君魯人恐加四牢焉爲十一牢

集說

杜氏預曰晉頃公即位通嗣君許氏翰曰禮好不結而財求無度則聘義亡矣蓋自是聘不

復志

趙氏鵬飛曰晉至頃公公室日衰六卿日侈頃公拱手爾即位於今五年始出聘諸侯蓋霸業既

隳諸侯外之彼亦知無求於諸侯故聘好有所不急也六卿勢醜德齊睚眦相忌何暇外交諸侯修霸業哉嗚呼文之業衰矣汪氏克寬曰二十三年晉執舍蓋原於士鞅之怒也晉之聘魯者十有一始於荀庚而終於士鞅始則仇而要盟終則怒而責禮霸者之臣所以修聘於望國之魯其非邦交之舊亦甚矣

宋華亥向寧華定自陳入于宋南里以叛

叛公作畔南里杜注宋

城內里名在今商丘縣境

左傳

宋華費遂生華軀華多僚華登軀爲少司馬多僚爲御士與軀相惡乃譖諸公曰軀將納亡人

亟言之公曰司馬以吾故亡其良子死亡有命吾不可以再亡之對曰君若愛司馬則如亡死如可逃何遠之有公懼使侍人召司馬之侍人宜僚飲之酒而使告司馬司馬歎曰必多僚也吾有讒子而弗能殺

吾又不死抑君有命可若何乃與公謀逐華軀將使  
田孟諸而遣之公飲之酒厚酬之賜及從者司馬亦  
如之張句尤之曰必有故使子皮承宜僚以劍而訊  
之宜僚盡以告張句欲殺多僚子皮曰司馬老矣登  
之謂甚吾又重之不如亡也五月丙申子皮將見司  
馬而行則遇多僚御司馬而朝張句不勝其怒遂與  
子皮曰任鄭翩殺多僚劫司馬以叛而召亡人壬寅  
華向入樂大心豐慙華慙禦諸橫華氏居盧門以南  
里叛六月庚午宋城舊  
廊及桑林之門而守之

橫杜注梁國睢  
陽縣南有橫亭

胡傳案左氏初宋元公無信多私而惡華向三大夫  
謀曰亡愈於死先諸乃誘羣公子殺之公如華  
氏請焉弗許遂劫公取太子及其母弟以爲質公怒  
攻之華向奔陳至是入于南里以叛凡書叛有入于

威者而不言衛有入于朝歌者而不言晉有入于蕭者而不言宋此獨言宋南里何也威與朝歌及蕭皆其所食私邑也若南里則宋國城內之里名也傳稱華氏居廬門南里以叛而宋城舊鄘及桑林門以守是華氏與宋分國而居矣故其入其出皆以南里繫之宋此深罪叛臣逼脅其君已甚之詞也

集說

杜氏預曰自外至故曰入披其邑故曰叛劉氏敞曰入于宋南里者何入宋而居于南里也

蓋中國而守之然則於何畔或曰畔乎陳也或曰畔乎楚也公羊曰南里者何若曰因諸者然非也宋南里者入宋而居南里也又何疑焉家氏鉉翁曰書叛誅姦之極典華向首禍於國討而奔奔而復乃挾吳楚將覆宗國叛狀既著始書叛汪氏克寬曰穀梁云南里宋之南鄙非也凡書叛不言四鄙必書其邑此不言邑而繫之宋則爲宋城內之里名無疑矣又曰叛直叛也謂直叛而不作亂夫外挾吳楚之援

將以覆其宗國其君幾不能自保猶曰不作亂耶其書自陳陳亦有罪矣以奔亡之臣而能入國以爲亂非陳助之兵力則未見其可也晉荀吳會齊衛曹之師以救宋而不書圍宋南里者悼公圍彭城則以五大夫歸荀吳救宋而逸賊使華向得逭不臣之誅故不以討叛予之也

### 秋七月壬午朔日有食之

左傳

秋七月壬午朔日有食之公問於梓慎曰是何物也禍福何爲對曰二至二分日有食之不爲

災日月之行也分同道也至相過也其他月則爲災陽不克也故常爲水

集說

孔氏穎達曰莊二十三年六月日食秋大水此二十四年五月日食梓慎曰將水昭子曰旱也

其年八月大雩旱也則亦不是常爲水也汪氏克寬曰日食三十六昭公之世凡七見比之他公災異

最數自即位至是年四書日有食之矣梓慎不能因公之問告以遇災而懼之意乃云不爲災使公怠於修政遂致失國蓋黨於季氏而姑爲諂諛以悅君也王氏樵曰案詩十月之交朔日辛卯日有食之亦孔之醜周之十月夏之八月秋分之月也而甚可醜惡七年四月甲辰朔日食春分之月也而云魯衛惡之安在其不爲災邪梓慎不能因公之問告以省德消變之實而爲是說以滋其怠玩卒使出逐應陽微之象非忠臣也

八月乙亥叔輒卒輒公作痊

左傳於是叔輒哭日食昭子曰子叔將死非所哭也八月叔輒卒

集說杜氏預曰叔弓之子伯張趙氏鵬飛曰叔輒弓之子無事業見於經而獨書卒志世爵也

附錄左傳

冬十月華登以吳師救華氏齊烏枝鳴戌

後人有待其衰盡及其勞且未定也伐諸若入而固則華氏衆矣悔無及也從之丙寅齊師宋師敗吳師於鴻口獲其二帥公子苦雒偃州員華登帥其餘以敗宋師公欲出厨人濮曰吾小人之可藉死而不能送亡君請待之乃徇曰揚徽者公徒也衆從之公自揚門見之下而巡之曰國亡君死二三子之恥也豈專孤之罪也齊烏枝鳴曰用少莫如齊致死齊致死莫如去備彼多兵矣請皆用劍從之華氏北復即之厨人濮以裳裹首而荷以走曰得華登矣遂敗華氏於新里翟僂新居於新里既戰說甲於公而歸華姪居於公里亦如之十一月癸未公子城以晉師至曹翰胡會晉荀吳齊苑何忌衛公子朝救宋丙戌與華氏戰於赭丘鄭翩願爲鶴其御願爲鷩子祿御公子城莊董爲右干犂御呂封人華豹張句爲右相遇城還

華豹曰城也城怒而反之將注豹則關矣曰平公之靈尚輔相余豹射出其間將注則又關矣曰不狎鄙抽矢城射之殪張句抽矢而下射之折股扶伏而擊之折軫又射之死于犂請一矢城曰余言女於君對曰不死伍乘軍之大刑也干刑而從子君焉用之子速諸乃射之殪大敗華氏圍諸南里華亥搏膺而呼見華軀曰吾爲欒氏矣軀曰子無我廷不幸而後亡使華登如楚乞師華軀以車十五乘徒七十人犯師而出食於睢上哭而送之乃復入楚蘧越帥師將逆華氏大宰犯諫曰諸侯唯宋事其君今又爭國釋君而臣是助無乃不可乎王曰而告我也後既許之矣

鴻口杜注梁國睢陽縣東有鴻口亭今在河南歸德府商丘虞城二縣界揚門杜注睢陽正東門曰揚門赭丘杜注宋地後漢志陳國長平縣有赭丘城應在今河南開封府陳州西北境

冬蔡侯朱出奔楚

朱穀作東

左傳

蔡侯朱出奔楚費無極取貨於東國而謂蔡人曰朱不用命於楚君王將立東國若不先從王

欲楚必圖蔡蔡人懼出朱而立東國朱愬於楚楚子將討蔡無極曰平侯與楚有盟故封其子有二心故廢之靈王殺隱太子其子與君同惡德君必甚又使立之不亦可乎且廢置在君蔡無他矣

集說

劉氏敞曰穀梁云東者東國也何爲謂之東王父誘而殺焉父執而用焉奔而又奔之曰東惡

之而貶之也非也即仲尼欲如此貶東國者書東國不亦足乎徒貶其半名何爲即貶其半名爲法者使蔡侯止名東當復貶去其上下而云蔡侯田乎胡氏銓曰楚虔誘殺蔡般執用蔡有蓋蔡君不共戴天之讎朱乃奔而親之惡何可言哉黃氏仲炎曰蔡左氏蔡朝吳奔鄭蔡侯朱奔楚皆由楚臣費無極之

護也詩云護人罔極交亂四國弗無極是已有國家者  
可無畏哉汪氏克寬曰或疑此書朱出奔楚後書東國卒于楚  
朱無歸入葬之文東國無出奔之事疑只是一事東即東國而誤  
爲朱也然左傳昭二十七年記沈尹戌之言亦曰出蔡侯朱而史記  
蔡世家亦曰隱太子之子東國攻平侯子而代立則朱東國固兩人也  
豈穀梁經文因後書東國而誤也歟季氏本曰朱曾祖般爲楚所戕  
祖有爲楚所用而往奔焉懼其殺已也信乎其往愬矣朱奔而楚之  
彊暴見焉嚴氏啓隆曰朱出奔楚而不書其卒是卒於楚也不成其爲  
君故無謚東國於是爲悼公東國隱太子有之子平侯廬之弟朱叔父也

公如晉至河乃復

左傳

公如晉及河鼓叛晉  
晉將伐鮮虞故辭公

集說許氏翰曰公失其重久矣故晉得輕進退之  
高氏閱曰魯衰而朝於齊晉愈彊則其往也  
愈數及魯之益衰也則往而辭焉春秋蓋傷魯之削  
也滋甚而不能以義自彊耳家氏鉉翁曰叔孫爲  
政季氏惡諸晉士鞅怒卑已故公爲所卻蓋季氏外  
交彊國大夫脅制其上也汪氏克寬曰晉之伐鮮  
虞豈妨於邦交之禮如文三年晉將伐楚以救江而  
公如晉成三年晉將伐麇咎如而公亦如晉未聞辭  
公也況是年晉實未嘗有事於鮮虞蓋託辭以拒公  
耳余氏光曰黃氏曰傳載晉有鮮虞之役故辭公  
晉豈無以待公乎季氏之彊昭公  
之弱晉助其臣而不有其君久矣

欽定春秋傳說彙纂卷三十一